

摘藻堂四庫全書薈要

集部

欽定四庫全書薈要

集部

御選明詩卷三十四

詳校官原任主事
臣李斯咏

欽定四庫全書薈要卷一萬八千五百三十四

集部

御選明詩卷三十四

五言古詩十九

陶汝鼎

金正希招集練江醉宿清淨寺

冬霜萬壑陰江永日將夕
畫舫泛容與川暝光愈白
急風吹燭花谷響合歌拍
小榼僧厨來蔬笋界方格
語笑酒易傾如以桐扣石
柱史如枯禪城市無一宅
酒深思

啜茗同作虎溪客
貝葉啟禪書
梅花落瑤席
坐久聞妙香
一榻隨所擇
睡鄉鐘鼓鳴
林鳥翻旅翮
吾亦步下山
佛燈猶照壁

吳本泰

任丘張氏園
藍田先生授經處

不識魚君陂
幸識魚君令
城隅敞臺榭
水木相翳映
謂予此棲遲
差可閒眺聽
是時秋氣深
白露漸蘭徑
瘦石裹苔斑
寒花棲蜨暝
女牆邏柝喧
梵閣宵鐘應
慮淡羣

物輕時危百憂并皎皎明月枝驚鳥棲不定茗窓靜披
覽冥緬獨無竟昔賢曾授經履履痕猶賸

臨淮道中雪

昨日春氣暄僕夫俱喘汗今晨北風厲雪花卷行慢天
時自迴薄人意驚錯換况乃事徂征惻惻羈魂斷長淮
望不極鍾離道方半踉蹌赴郵程渺瀰惑阡畔暝鴉寒
不呼翻飛忽零亂車上冰滿髭車下泥沒骭紅燭映深
簾寧知旅人歎

陋巷井

改邑不改井泠泠無古今原泉何方來或是泰山岑仰
之既彌高俯之亦彌深屢空其庶而澹然助齋心仲尼
飯疏飲應與共酌斟禹稷憂飢溺易地同所任至味無
異旨樂哉此中尋

王潢

宿松風閣分韻得吟字

靄靄歲云暮風雨恒見侵小霽憇山閣蕭颯吹寒霖澗

聲亂餘響鐘鼓沈清音蒼叫臥蜿蜒拏攫力不任羽觴
亦以歇剪燭聞鳴琴嘿坐得冥會擁褐成孤吟須臾微
霰集晨起雪在林樵徑斷人語四野號飢禽皎皎二三
子貞白同松心炎暉諒可竢見睨消重陰

徐銘敬

山行

峯巒媚奇景煙華合芳甸澹澹晴疑雨江村半隱現春
水清不流悠悠山谷轉小橋度幽居山深人不見佳地

正難值紅塵妬清燕白日原上微回首暮雲變

徐之瑞

雞鳴嶺

披榛陟山椒輒摧馬盤桓歷險未云疲逶迤入雲端仰
探巖谷偪俛視井邑殘千峯列遠戍兩崖壯重關垂蘿
蔓幽壑怪松支危垣灌木鬱蕭穆哀風嘯叢荏乘墉或
失恃務德誠所難蟋蟀在牀下我生詎遑安勞勞多苦
辛惻惻起悲歎

劉同升

由百花溪登玉笥山

朝看山出雲暮看雲入笥山行若無蹊恰有青童至指
點絕壁間仙臺藏勝地藤枝匪易攀屐齒猶可置日午
聞雞鳴巖椒啟金字出險陂漸平劃然入境異連峯涌
下界撲面聳層翠因過丹竈房縱覽紫微志白花雨外
明紅果林間墜晚食供芋魁晨鐫倒茶櫃坐久慵下山
踟躕想真寄塵網詎得辭幽期偶然遂

堵循錫

感遇

古木生高原
返景清光入
曠野無縈懷
寒暮見榮特
蒼皮剝蘚露
森陰涼蘿月
宰緯風雨欽
惆恍鬼神格
以茲老柯幹
應有奇胸骨
危立神不怡
念子令人惻

蔡道憲

荅居岳麓者

蹴碎岳麓雲
剪斷湘江水
楓丹染院深
高飄菊衣紫
竹

露垂朱霞霜華拂劍齒聞君多苦心中夜嘗數起敲火
作長吟山鬼驚偷耳特寄素心人虹捲吳縑裏早晚欲
行尋相將索奇字

陳子龍

仲夏直左掖門送彞仲南歸

金塘迴素波中有雙鴛鴦託身在清禁和鳴君子旁顧
此同林鳥孤翼忽南翔生平志慷慨何事獨難忘本為
四海人豈得常相將丈夫重知己萬里同一鄉黽勉效

貞亮德輝在巖廊莫憂青蠅多和璧貴善藏執手不能
語悵矣結中腸

雜詩

日夕登高臺馳目窮千里衆星燦雲間經緯誰能理神
哉玉衡運天樞無終始上有瓊瑤宮紫皇日端委我欲
乘飛鸞銜書碧雲裏聲殷途逾遐心長情何已懷中五
色石相見徒磊磊

山椒微風發薄暮遲佳人頽陽澹林表素月生河津佇

立懷往路時晏多苦辛君家青雲樓瑤華艷當春皋蘭
亦有芳欲寄良無因歡愛豈足重要使恩誼申浮雲誠
易阻白璧終見珍

至道無相非末流乖心迹高懷苟不亮執誼日以積賢
隨貴同用愚與賤交役騰名自有階投譏豈無隙營營
棘上蠅可以携金石履純思寡尤超方鮮奇策毀譽苟
未忘顧影慙跼蹐

尚口自有窮捫舌豈我欺伊予昧機變率性不自知遇

物皆裏言當險若履夷于已固弗慎安望人保持俛仰
生平內常與悔相隨沈默苦不早壯盛忽若馳世人貴
形迹君子敬威儀臧否聖所誠南容真我師

賦得浣紗石

越紗出機中剪向春風裏皎若秦川雲飄揚隨潒水佳
人臨淺瀨無言空徙倚不惜紅顏勞素絲誰為理斂衣
入中林澄江皓千里青苔日夜生沈思竟難已

苦雨

洩雲屯層嶺密霧瀰空林南山發殷雷北郭滯愁霖紅
泉落虛壁潄水漲遙潯危條度飛鼯宿莽聚鳴禽桃英
蕩華色麥穗悲陸沈天畢騁所好屏翳日相侵徘徊華
軒下彷彿碧山岑昏墊蕩下土沈冥符道心側想零雨
篇空懷梁父吟

初春雪霽

昭昭青春暉散此芳林曙陽條披惠風陰巖積幽素鮮
華映雲峯澄霽明江樹茵閣見參差麥隴開迴互中庭

蕙草生曲沼文禽聚端居淑景移極目淵賞遇雖滯懷
祿情未緬丘園趣履道任清時守真謝馳騫

沈宸荃

謁梅子真祠

粵昔南昌尉志存匡社稷上書糾時宰孰云非臣職漢
網已弛網顛木難再植明哲早見幾冥鴻避矰弋隱跡
吳市門學道此山側豈同養生家脩鍊資服食旁有濯
纓池丹井字并勒昔人驂鸞去無從辨虛實藥苗長幾

何求之或可得酌酒坐高岑浩歌瀉胸臆

方以智

古詩

嶺外稀繁霜草木不黃落窮巷生陰風客心乃蕭索斗
杓指實沈勾陳半隱爚蟋蟀滿牀下篝燈夜懼懼此地
羅浮山古人嘗采藥何不披短衣入山飽藜藿曉從外
來者皆言道路惡我欲依神仙神仙不可託

東北覆陰雲其下吾故都中路一奔走恨隔天一隅虹

蛺蝶下平地曠野秋荒蕪翼日大風雨慎勿臨長途人傳
使者來旌旗蔽通衢嗟我遠遊子不敢同馳驅道左發
長歎歎者一何愚

海渚無橋梁日暮波浩浩車馬不能通遠望怒如擣浮
雲日以變我親日以老萬里飛煙塵天末傷草草夢見
故鄉客言歸苦不早舊宅屬他人斗大梧桐槁親戚有
書來書中何所道上言鄰里殊下言故人少

和陶飲酒

子安問黃鵠萬里將安飛八極紛茫茫中路能無悲三
萍飄大海風波還相依安得如潮頭朝夕自言歸一經
離亂中盛年忽已衰有心不敢推有口當依違

擬古

曲閣臨廣陌下折楊柳枝上有愁思人終日不披帷雜
珮何玲瓏實為君所遺被服至于今未嘗少乖離夢寐
難以逝願托東風吹迢迢萬餘里君心焉可知安敢望
君心惟念寒與飢

青青園中柳當我西南牖征夫從遠來一路平安不艱
難萬餘里涕泣不能口辭家未數年家人皆皓首貧賤
易出門別離一以久朱華被霜露焉能不速朽呼兒辦
麤飯聊樂不為厚但得故鄉人日飲故鄉酒

寄梅朗三

陰雨忽成雪北風吹樹林江流日千里安知遊子心中
夜一何寒自撫雷開琴瞿硎山人其當知我音

朱朝瑛

管寧

幼安亦賢者無乃太矯飾
牽牛蹊我田而自與之食
吁嗟有深意衆人固不識
干戈日相尋聞此庶少息

湯來賀

過舊寺次拙菴韻

將霽辨羣峯微雲在孤嶺
蘭若隱其間潭泉心共冷
衆卉含新色頽垣延古影
靈域世情稀懷抱春日永
清澗濯吾足崇岡振吾領
迢遞見匡廬憇寂觀幽境
我心多

憧憧茲焉安可靜

高承埏

上已偕同年諸子脩禊海淀

羲馭無停輪逝波焉可駐言尋佳節屆轉惜芳春暮緬
昔蘭渚遊少長樂咸聚蕭散依林泉慷慨託毫素諸君
跌宕士希風結遐慕濯流仍清漪褰芳復高步觴來俯
纖鱗曲終倚嘉樹閒情釋近鞅睇目眷霞寓脩短匪殊
途所貴適真趣各勉山水期于焉謝勞鷺

祁熊佳

寓山秋夜

羣動暝已息山窓夜逾響將母楓折膠或恐虎磨癢徐
聞落葉翻既下思復上氣盡信所之物各反其黨秋蟀
吟再三流螢時一晃申旦耿不寐樂遊念疇曩嗟我懷
沙人汨徂竟安往

周世臣

遊仙詩

園丘列奇樹北海生神芝翡翠曜瓊圃潛龍戲瑤池飛
泉供漱齒白石為療飢姮娥降洪響宓妃領其頤隨煙
上三島飄風凌九疑持此傲下士投簪來遠期

姚奇胤

秋夜

遙夜苦無寐起視明月光涼風天上來隨月入我堂披
衣步前除獨立以傍徨蟋蟀既已鳴鴻雁亦來翔感此
時物變怨彼去日長生非金石姿安得恒壽康憂來不

可輟慷慨吟此章

徐孚遠

擬李陵錄別詩

微雲何澹澹
星漢燦以明
攜手步廣除
淚下如散霏
征馬臨岐路
徒御多抗旌
方當萬里別
能不叙平生
與子同一體
盤石紉芳蘅
芳蘅自有時
盤石徒縱橫
一朝兩決絕
何能復合并
願託子懷袖
因風馳我情

皎皎藍田玉
鏤作玦與環
攬環與子佩
取玦結以鞶
子

環信鎮栗我玦鮮垢癥誰知一物微決絕義自天歸雲
入勾注密雪淹陰山握手臨路歧涕泗共汎瀾歎彼南
翥鳥奮飛何由還

錢茶

園居次韻

白蛺飲晴壑劃破蒼苔古傾崖與迴瀑化作半峯雨深
夜排空來可聽不可數山勢既奔蹙飛濤互仰俛頑雲
觸石碎似鑿五丁斧耳目得新警天真爛漫吐

有手著書樂有眼看山好握劍割塵鞅斗室皆瑤島孤
峯峙檐前相對成二老簣簞滿幽谷出土風雷繞花靨
雖到地花魂猶樹杪松柏有時薪彭殤奚大小適志取
目前婚嫁何時了

徐枋

送遠詩

采采蕙蘭花皎皎冰雪姿含英當空谷正值秋風時秋
風率以厲百草奄披離子獨執高節臨風颺芳菲

別詩

上山采薇蕨日暮不盈把苦飢良足悲將遺同心者良
友遠別離踟躕送于野我有盈觴酒黃流傾玉竿申以
遠遊曲中懷期共寫清商一何悲四坐和者寡恐傷遊
子心攬涕不敢下景光已西馳日月不我假

宮偉鏐

感興

獨立古大堤水清人境異猗蘭被芳臯遊龍紛櫛比灼

灼芙蓉花臨風發娟娟欲采更躊躇同心竟異地美人
如可懷遠道如可寄珍重語芙蓉信宿莫憔悴

寥廓俛大陸蕭條悲北風生非金石堅而為情緒鍾猿
鶴亦隨化况復沙與蟲我欲駕滄溟高揖浮丘公靈藥
不可得夙昔憂沖沖孔顏有真樂仁義植其躬朝夕把
書冊道心與之通庶幾追古人令名垂無窮

張若義

毘陵夜泊

波流自洸瀆風雨何淒其草樹既零亂鱗羽多參差行
路懷苦辛征人傷別離中宵不能寐悠悠有所思

別離

昔為膠與漆今為參與商樹上連理枝池中兩鴛鴦切
莫種楊柳楊柳徒心傷亦莫栽桃花桃花空斷腸春風
自婀娜秋月自飄揚夏簟虛簾幕寒缸疊雪霜暮猿愁
夜短遠雁及天長梧桐既凋落不集雙鳳凰崩崖流斷
雲一低復一昂綠綺置君側白玉列君堂相顧復何言

盡此離別觴

趙庾

雜咏

西山石磊磊叢草奮階除中有耕雲叟力芟尚有餘幽
蘭發素莖其芳襲人裾秋風忽搖落綠葉日以疎移根
贈遠人榮華俟來且

黃淳耀

和陶飲酒

朝光入山樓棲鳥已驚喧攬裘暴新陽暖氣無頗偏仰
視天宇清得我檐前山山中出岫雲變滅何時還我心
正惆悵默與風鈴言

和癸卯歲始春

舊穀滿場圃知子良非貧糟牀注春醪酬汝四體勤開
軒一笑粲莫適為主人薜牙花乳香鱠鏤銀絲新咄嗟
行酒炙童僕皆欣欣中原有格鬪行子勞問津不能濟
時代甘與農圃鄰逝辭謝景夷來就劉遺民

和歸田園居

家無環堵宮所至思買山何異侯河清人壽期千年安
得如古人采山復臨淵敬受十賚文賚以北阪田巖棲
高百層老屋餘三間湖江流東西竹木榮後前中央置
講堂文史浩如煙歌風復蹈雅樂志忘華顛此意空蹉
跎飛光去閒閒畫餅不可食談諧聊復然

和擬古

弱年見承平自謂長如茲一從更事來世已非前時雕

虎橫井陘黃流混澗溜仗劒出門去行行復狐疑路逢
季主儔問彼龜策辭龜策不我告黽勉自研思仁義心
所安皇天吾不欺瀉水置平地東西任所之撫琴操猗
蘭亂之以俛詩

吳易

觀蒔

四月鵲鞠鳴五月挿新秧南風吹平疇蕭疎間成行甘
雨久未施東作意倉忙此鄉最瀕湖瀉海惟三江湖身

若仰孟江口若括囊東婁沒故道吞噎浩湯湯夏公鑿
黃劉吳淞走中央安瀾見禹績蓄洩匪及詳疏排後忠
介滕岸前文襄于時穡事盛燠滂多周防舉錡煙雲興
歡笑饁酒漿吳謳互激遠風俗登陶唐轉輸甲數郡精
粢供上方嗚呼百年來今古一慨傷塗泥往所載水柔
土不剛治水等治兵操縱貴在綱蓄之欲謹馴驅之欲
奔驤上圯下則澱陂蕩歸豪彊淞流日緩細渠沼飛塵
黃昔也憂在潦今乃并患暘外梗與內壅相循終兩妨

空霞抱赤日天漢何青蒼桔槔無時休夜月聲哀涼焦
焚竟大半時殖安所將婦子對歛歛其意即戈斨吾聞
園田制縱浦間橫塘斗門時啓閉撩淺衆力勦浦浚三
丈降堤厚八尺昂斯工豫農隙督率免亂嘗奈何三公
後水利終茫茫催科號曰能本計讓弗遑東南國命繫
荒哉問商羊嗷嗷幸霖澍佇茲秔稻香秋成急漕輓未
計陵汝倉聖人勤精禋蛟龍奔盛祥豈必恃地力天心
宜降康努力事胼胝微衷答穹蒼

張家玉

錄別和李定夫

鴛鴦戲清池兩兩常相倚
羽翼臨當乖風波中道起
相對尚難知何況萬餘里
來親去者疎母為貴君子
予懷抱區區君諒執高誼

劉曙

包山夜坐示門人許子工虞

悲風夜不息微妙生虛空
心跡雙闌然端倪在其中
理

豈羣動違性與孤明通庭光付流月林籟歸疎桐餘香
一絲溫繚繞遊無窮捷疾追所晤起滅何匆匆酌水知
湖波舉似將母同

贈粵東黎子美周

翡翠生炎州光彩何陸離珊瑚湛海南灼爍生奇枝黎
子美無度冰雪為標姿罔象寄心想爾雅搞文辭清芬
齒牙間披襟散涼颼驟合意傾倒乍離中跼蹐羅浮七
十二峯峯助搯頤願乘雲霞色往映雙我睂

葛一龍

曉行

日出已杲杲西月還相照
農婦餉晨畊牛衣覆霜草

舟中九日

九日渡頭人迎風倚孤棹
江空落日遠入夜生餘照
無菊亦無侶開尊自相勞
紅葉點鷗波青煙出漁竈

寒園

玄冬浹陰沍霜風摧灌莽
寓目鮮幽翳一畝亦云廣
日

出茅簷間雲生泥壁上偃仰足昕夕親朋息來往空林
如有人互答斧冰響

送陳徵君歸四明

秋風戀徂暑吹動水煙熱與子結新歡孤懷耿將別言
從若耶去路指鏡湖月散髮蕩扁舟荷花槽前折

送徐巢友還山

吾廬在空山戶牖白雲滿有樹常設設餘花亦纂纂城
市不可居晝夜一何短買藥挂驢背行歌去人遠日落

深澗中洗足春泥暖

朱茂暉

方池

方池不種荷亦少蒲菡萏惟有梓樹花紛紛落紅糝風
波永不生寸心默相感

朱茂曙

寄王處士遙蒼

自我去城闕子亦棲畝丘一舍道豈遠鋒鏑迷所投耦

耕判沮溺闢徑違羊求凌晨起眺聽登我池北樓疎梅
吐冷豔小鳥鳴啁啾春風吹戶外念子心悠悠

許正蒙

舟經橫塘憶桐江舊遊

輕舟何搖搖來自青谿曲層崖落深翠新波湛空綠我
家漸水東一川接天目對此頗相似殊令幽思足將攜
素心人共著桐君錄

馮鼎位

園居述懷

夙昔抱奇尚雅志託園林愛此清曠地而無俗塵侵林
間多繁花枝頭有鳴禽夜月登南樓朝爽眺西岑三復
歸來辭斯人愜我心誰云今古異千載同高襟

詠史詩

驂騑馳康莊燕雀守一枝大小固有分丈夫安所期烈
烈班定遠投筆謝故知鷹揚萬里外封侯名四垂生入
玉門關故人猶下帷樹勛在少壯白首徒自悲

王廷宰

鄴園

置酒娛清夜西園驚華轂素月升澄景微露泣佳木灼
灼芙蓉姿臨波漾輕縠四顧命賓朋灑藻競豐緡感彼
蟋蟀篇勞生何局促鼎鼎百年內歡樂苦不足列坐進
芳醴彈箏弄纖曲霓旌遶層阿鳳吹流深谷遨遊及良
時庶以快所欲

楊士傑

述懷

獨酌對芳尊悠然懷古意世事何足論外物心自遂舉
杯樂天真多求反為累迴迴出塵姿油油齊物志笑傲
得此生陶然釋所繫

劉思祖

汪魯望孝廉軒

誅茅託林棲結志在玄賞芳美歇春華涼飈薦秋爽鳴
琴向寥廓長嘯散蒼莽明月揚素輝疎篁發清響尊中

幸不空方外恣獨往偶坐興未闌還思棹煙榜

張鹿徵

友人移居

居市厭市囂入山苦山僻非山非市間卜茲五畝宅到
門水一灣眠沙鶴一隻遙望鍾阜巔雲霞幻朝夕乍見
雨脚沈忽焉晴絮褰主人如冥鴻高舉不可弋邱壑盪
心胸花竹恣夷憚何時載酒過為君理雙屐

歸昌世

和陶雜詩

宇宙何茫茫起滅同一塵胡為一日間各營百年身華
堂與崇丘去疎來者親我廬非我有四顧誰為鄰有如
遠行客當夕已戒晨有懷不勝嗟舉目皆勞人

清溪直村塢修竹帶鄰曲花明戶未開風暖睡初足道
侶兩三人開樽傍棊局永夜雜笑言留賓方滅燭柝響
間疎鐘羣鳥啼朝旭

晨朝理輕策日暮稅歸鞅行行林水間翛然濠濮想時

見行路人芒芒將焉往不如播種者晴雨候消長野舟
橫可渡不復愁河廣深感田父言耕耰戒鹵莽

秋深霜露繁高原榆柳稀征途戒舟車鴻雁天邊歸徘徊
岐路旁薄寒吹我衣悠悠自世路幽獨那可違

秋懷

壁蛩收殘音哀蟬振餘響圖書盈坐隅覽古歎其往揚
子千載知鍾期並時賞窮通非巧拙徒為增俛仰

不雨竹猶響未露草先濕齋空覺風來石暝如人立旅

客有歸夢析驚夜何急舉酒酌桂叢言旋會將及

秋日懷獻之

小齋雜林木前後任棲息幽境靜裏過秋光閒處得天
風動琴書澹然白雲色思與古人共惆悵空相憶

偶成

出戶事如織不若深閉關只緣長貧賤遂覺心神閒有
時靜看雲目數飛鳥還栽花既云勞灌畦亦孔鑿不有
田園樂何方駐衰顏

叔父季思別業

性本耽幽寂自然愛丘園時復執道書獨坐當南軒清
風池上來有客閒叩門共坐竹林語蕭然酌一尊隔溪
聞犬吠雜以樵者言斜日返深巷鳥雀林中喧出門忽
自得緩步忘遠村歸途殊眇眇月白蘿陰繁

題古社圖

玄陰窮短晷淒風號北林伊人美無度高會愜我心願
言振騷雅一返太古音斯意空千秋玄覽一何深高堂

羅羣英前除鳴素琴含情同慨慷對酒不能斟紆鬱今
古間曠焉發高吟久要意何許睇彼青山岑

萬時華

秋日過丁氏妹簡時之

西風吹古巷驅我下澤車百鳥集喬木森森見君廬諸
甥聞我來整履奔前除僮僕聞我來壺榼縱橫趨妹聞
阿兄至結束臨中厨呼婢入後園擷取泥中蔬老大同
鄉里謀生但飢飭入門共一笑內顧悲有餘寇盜滿山

卷三十四
谷骨肉幸亡虞上堂古琴靜尚保先人書天命各窮達
安樂且須臾命酒酌前軒忽已星月舒徘徊白露際天
河淡眉鬚安知鹿門翁偃蹇非良圖

歲暮田居

中歲破憂患苦為俗所嬰詩書沿先轍且復愛斯名晨
梳啓青鏡覽容時自驚白日照東壁素月已西楹莫疑
造化理榮悴緣物情弱草無強蔓苦荼無甘英

曉度牛嶺

巨靈闢幽壤滂然劃茲區勢若羣兕蹲亦若干羊趨寒
光積巖壑高厚氣有餘恍疑虎豹宅或有仙人居山中
建子月萬籟天風俱雲雨助奇勢車馬爭盤紆鴻濛遇
雲將靈境將焉如

卓人月

泊烏鎮不寐作

逆風逗歸期今夕寄淺港月出人不知閉戶若羸蚌遠
寺燈微明未罷老僧講良久喔喔聲荒雞引其項

吳天泰

示族子

人生各分定如面異黔皙讀書求仕宦運數杳莫測不
如事田廩勤苦但食力我家本清門中葉浸流失相將
習遊閒遂乃離樸質流覽五服遙頗喜見諸姪水國采
菱魚陸海種杭秫上可奉高堂俛足寧家室少遊嘗有
言款段與下澤鄉里稱善人庶幾念祖德

題周仲吉畫

雪色滿天池
扁舟傍深谷
危峯入層雲
幽意動遐矚
溪橋凍未澌
老鶴立寒木

周岐

詠懷

鳳凰鳴高岡
豈為梁稻謀
丈夫志四海
豈為利名求
笑彼田園子
白首戀故丘
營營井里間
富貴稱殊尤
烏知達士心
一息翔九州

送豫章萬茂先秋浦劉宗伯應徵辟

擊鼓深宮中通市無不聞良玉媚重淵鬱鬱上為雲君
子懷令譽卓犖自不羣南陽雖有田豈必老耕耘浮雲
蔽中天白晝苦不分肉食無遠謀喻喻如聚蟲奮身出
塵埃宜判猶與薰聖代重徵辟蒲車何紛紛網羅及吾
黨責之以玄纁哲人貴及時况復事明君努力長安道
三策振奇文

劉應期

潔菴

有室曰潔菴舊址臨河築敗壁抵雨風短垣障水陸其
右路通門小徑恣往復窓紙耐晴明庭卉間紅綠主人
無一長自言但不俗旁堆書百家中挂畫一幅畫埽肥
膩具制器尚匏竹或銜酒一杯或鼓琴一曲呼兒撰几
杖對客任歌哭閉戶判十年寤寐矢弗告

郭金臺

荒城懷舊

壺山隱孤雲同儔日四五城端隳蒼蔚白日蔽豺虎招

搖出南隅遊目眺江潯健羨遠行舟水居結鄉土豈無
舊里戚所思竟何主河魴衝敝笥靈籟翔天宇秋風鴻
雁來作書繫湘浦

送陳逸子

北風湖上來春雨細如織殘寒守孤帆萬感不自抑故
人鶯花稠歲月忽已息君行騁萬里莫自填胸臆長安
佳氣繁孔道香風飾相見停輕車努力加殮食願拭摩
尼珠持照古顏色

雙清亭

我來憇東山注目清江北和風漾輕舸遊屐忻初陟危
樓湧層岡怪石互撐翊欲窮雙流勝曠覽各自識蕩蕩
城郭陰荒荒墟煙塞古今幾逝波賴此孤亭直苔碑競
前詰半受風雨蝕儒風自振古悲仰龍象力咄嗟三白
頭登眺有專識揮杯瀉高懷似欲生羽翼春光慰遲暮
古道曠胸臆

項真

社集分賦得竹林

入林非任誕懷抱良有託把臂愜同志痛飲戀狂藥脩
竹何蕭蕭微風籜已落故叢濯纖枝碧影墮杯勺盤桓
不能去嘯咏或間作管絃非所好况乃靈鼉罟仰視飛
鳥翔醉眼空寥廓契此考槃趣謝彼影纓縛寄語道旁
子沈冥與爾各

劉城

秋懷

秋雲日以薄秋夜日以長秋露日以白秋草日以黃此
時秋士悲耿耿不能忘豈無同心人飄零非故鄉蒼蒼
蕪葭遠乃在天一方欲往心煩紆漸我車帷裳

沈壽民

荅戴子

獨坐寡歡惊起步庭南端悠然何所矚吾自愛吾山故
人遺我書贈我古錦篇清辭響哀玉抗意天雲間世事
總戚促擾擾不得閒甘陵房與周南北部相捐如何程

夫子名共蜀朔傳有道秉昭曠感昔心憮然三復三歎
息歸犁東岡田

周立勲

咏懷

東登泰山巔累累見城郭秋風吹平原牛羊下寒澤
尚本陰謀漁釣竟所託神明啟遠疆後世資經畧遭逢
良有時志士固窮約飄蓬西南征浮雲散林薄悲哉大
國風田橫不可作

邵濂

雨

終日雨如絲連山芳草碧庭際孤雲屯遙村暮煙積野
渡行人稀圓沙一鷗白寂寞想晤言誰破蒼苔跡

高秉渠

湖堤

舍館意未安遊覽力已猛披衣出芳原蒼翠周四屏琳
宮千百尺巖窠吞顥景蘭若非一居鱗次若萬井旋窺

大佛寺却失龍象整其陽枕江濤其陰負脩嶺步步異
前蹤行行惜去境斷橋曾不斷石堤相與永綠柳何歲
隄間之桃與杏柔颺剪綺縠密葉含藻荇羣秀欣有託
萬象紛然炳歎息蘇長公千載若俄頃江山不改舊風
月誰為領撫景憶往昔令人發深省

江必顯

亦園主人邀飲

平生愛岑寂請遊亦不却平生少嗜好痛飲亦不惡但

入此園中便覺欣然樂綠竹常蒼翠丹桂久零落白露
凋楓林商風隕秋籜空齋晝閒靜棋聲應丘壑主人笑
而言且勿愁寂寞吾有斗酒藏待子來共酌樵青斫鱸
膾長鬚進丹蘂沈酒至昏黃風雨聲蕭索

譚貞和

社集分賦得金谷

日月長麗矚溪山餘素期別廬欣賞間更復賓主宜
監軍曠高懷祭酒澹塵思盤礴澗道上澗冽荇參差竹柏

既峭倩藥草復繁滋觥飛壘交錯絃急管威夷迢迢錦
步障晃晃珊瑚枝姬侍列雲屏倡舞喧相追豪侈極人
目俱言此會稀席終方奏序興往各稱詩遺韻珍當年
勝遊示來茲不負歲寒約意氣歡足持

張屈

山居懷金文裕

江光映林際纖月微微落冥冥靜夜鐘沈沈響深閣言
念君子交於道信不薄空谷常感懷終不我離索

鄒斯盛

寒食日登莫釐峯望縹緲峯

去年風雨節閉戶春江冷今年今日晴振策凌絕頂野
曠雲垂垂蕭條水西景悵望無一言殘陽下高嶺

華淑

洞庭西山

圓湖比滿月青山猶挂影晴陰網輕瀾深翠積遙嶺潌
洄柔櫓前如魚狎藻荇戀彼楓袖香丹黃點妍靚終期

宅此居一樓一舫舫舫石公遙樓當銷夏冷竹木侍
巾裾煙雲開簿領

李翹

感遇

幽蘭出深谷冰雪揚芬芳天桃得春風榮華耀朝陽萬
物各有時盛衰詎可量君子重制行通塞夫何傷對此
遲日嘉且進花前觴

寓言

松柏有蔦蘿生死共依附
柔弱不自持垂垂百尺樹
草木匪金石榮華寧久駐
摧折非所期飄零更誰顧

吳棧

清遠峽

雨過山氣清兩禺望相峙
樹裏出鐘聲煙澄滿江水
熠熠林光中露重滴松子

苦寒

嚴霜摧百草北風何其涼
我愁豈在躬憂此道路長
忽

忽行役中不復知景光凝冰屬仲冬萬物咸閉藏吾非
寒號蟲乃思驕鳳凰躊躇三歎息落日照路旁

金是瀛

訊馮天垂病

團團墜秋露戚戚下庭柯念吾同懷子鍊藥守巖阿洗
馬體善羸徵君愛養疴側置素絲琴手把黃金華仙莖
傳三島遙情憇八遐七發為余起二豎其奈何言保金
石軀黃髮共婆娑

吳騏

集張吳東先生齋分韻得則字

虞夏日以遙老成存典則郊居幸多暇過從屢晨夕是
時秋氣深澄流見沙石黃菊初作花鴻雁遠為客歲寒
各自愛斜景深足惜觴酒相為娛高談展胸臆何必與
古同取快意所適

雜詩

綢繆情何極欲別無奈何轅馬鳴蕭蕭僕夫戒前途絃

歌慘無緒觴酒覺已多觴酒非吾歡四顧何茫然寒風
動野草苑結不能言昔為漆與膠今為矢與絃生平纏
綿意盡此斯須間纏綿不可展逝轍不可返繫駒永今
日今日惜已晚知君念我厚為君加餐飯

春至百卉榮鳴禽聲啁啾桃李各自媚靡蕪被道周駕
言從友生阡陌恣行遊肴蔌進芬芳旨酒消百憂少壯
苦難恃節序不我留時無管夷吾身名將何酬

古人敦交道傾蓋攄心胸成言貴勿欺殺身以相從末

世競錐刀險反自云工酒食共宴笑干矛潛相攻誓言
如皦日背誕猶飄風三王無詛盟甘醴必凶終誠信苟
可孚溪毛薦王公

高樓臨通衢綺窓耀朝陽蓮茹飾金碧玉女窺其旁珠
簾曲瓊鈎龍錦文幕張中有絕代姿盼睠生輝光盛年
方二八舉體幽蘭芳詩禮夙所嫻容止何安詳暮春日
遲遲援琴激清商潛波出遊魚遙空下鵷凰知音世難
遇默默歸空房尺璧儷硤硤詎若韞匱藏玉顏苟自愛

不嫁庸何傷

四座且勿喧願聽歌一言請說屋上瓦本出田野間陶
人範成形鍛鍊得剛堅公輸葢甲第置之大廈顛日月
光照臨湛露何溥溥高居棟梁上崔嵬象南山同時田
中泥孰敢相躋攀世故不可期大廈寧久安阿房及建
章回風動茅管田夫厭瓦礫投擲棄江干高居幾何時
徒令本質殘

日暮登高丘望見車馬道良人從此去三年音信杳入

城見親故出城見墳墓君非他鄉人何為不返顧弱女
解秦箏幼子通孝經君歸攬君衣使君不復行我願車
馬道掘為千仞池百爾閨中人永無傷別離

朱茂暉

出邪溪由東渡橋進帆鏡湖

趁筏下邪溪溪回水凌亂指顧未俄頃雲林已改觀前
瞻羣嶺高卻睇後峯斷出口尚潺潺入湖方漫漫叢叢
煙樹分菽菽蕪葭散灩澦迅川風宛轉隨沙雁蘭亭懷

右軍白洋尋賀監千載跡如存一曲情可翫

於潛舟行抵桐江

浮溪始安行登山止凌緬鬱紆倦攀陟清曠縱遊行目
對川禽飛耳接迅湍轉迴峯沓屢迷連煙晦莫辨夕翫
淹水宿晨興愛沙飯已入桐廬溪復歷富春峴雙臺峙
中江一竿垂日晚空波澄浩渺春雲澹舒卷但乘逸興
多詎覺古人遠

栗里

陶令辭折腰達生媿形役余無腰下組欣得附遺逸志
愛名山遊不待婚嫁畢訪古入栗里摩挲醉翁石頽然
蒼煙中宛爾面猶識茅屋隱在望五柳共蕭瑟雲山何
渺渺巾車日將夕瓦雀鳴檐端稚子候門隙凡物良有
依孤生貴所適朗咏田園篇千載竟不隔

南園雜詩


鳥啼春晝閒雨過池草綠飛花不待風紛紛自相續靜
夜彈鳴琴湘簾隔華燭尚想慕幽人沈思亂心曲

王鎬

區山

洪波挾石根土盡石傾壓虎豹攀猙獰甕盎踏圓滑雲
曠古洞寒雪浸芳洲茁不知灘渚寬妄議波濤狹尚注
湘江三猶吞雲夢八羈客纜舟暮居人收市牘不辭鄉
國遙直感年華匝村雨衆雞鳴汀煙一鴻發

御選明詩卷三十四



總校官庶吉士臣侍朝

校對官檢討臣蕭九成

謄錄舉人臣傅瓌芳

欽定四庫全書薈要

集部

御選明詩卷三十五

欽定四庫全書薈要卷一萬八千五百三十五

集部

御選明詩卷三十五

五言古詩二十

張宇初

獨酌

曙雨改餘春
新流注深谷
幽居絕世氛
微月澹叢竹
麴蘖非素耽
聊從寫情曲
吹萬等勞生
胡能競奔觸

夕懷

落日未沒山明霞爛西隅疎林俯平野飛煙散輕鳬宿
鳥棲復鳴燈火起鄰墟明月照東園餘寒襲裳襦啟扃
坐虛庭延泳思莫舒世故感浮情淳風朝夕殊玄天默
無語終爾歸空無

山舍夜坐紀興

潛僻非世圖幽恬足真賞晨招逸人來遠策緩藜杖叙
別罄春醪園蔬雨餘長延歡喜就宿窻籟風泉響草露
喧候蟲林星耀虛敞芳池寫初月山氣襲膏壤沈寂諧

靜便棲遲愜敦養輕蜩蛻污濁冥鯢絕疴癢久違商皓
遊焉期漆園想然薪盡永夕聊與謝塵鞅

乙亥季夏還山居偶興

末夏熾餘暑幽期諧素襟川原蔽繁綠溪渚澄蒼潯田
舍靜雞犬荒蹊抱深林圓淵敞靈構疊嶂羅高岑荷氣
薄朝露魚波依重陰披襟遂恬息濯澗清閑心遺世匪
塵傲養真宜自任秋風動早思寫我丘中琴

甲戌三月二日出行

霽雨解前峯幽原策歸路荒蹊蔓草春野水平橋度悅
鳥近聲圓耕牛緩犁步豐泉陰壑鳴密竹中園素靈岫
敞虛軒荆扉護雲固新流泛池溢繁翠盈窗戶掃榻理
殘書扶筇歷榛顧丘林適所娛垢濁豈浮慕虛澹美遐
蹤顛危惕宜務安由絕世緣木石藉深處倦翮止枝巢
先迷感餘悟聊舒棲遁情生意足農圃

晚霽

夕陽媚春暉浮翳方四展喬木欣向榮陰雪明孤巘疎

簞鳴晚風寒霜曉初遍
悅鳥喧漸和新流泛池淺
遙煙澹墟鄰雲磴盤幽
蘚落日雜農談園蔬綠
方翦年增感易深悔吝
疇自遣素業慨高懷研
心資礪礪翫世適餘生
誰將眎真踐

仲春喜晴

近社喜連晴林風和仲
月清霜滯秀姿偃臥澹
怡悅林暝鐘盡遲池平
草初茁溪嵐散喧瀨浦
樹春榮發淹抱非世徒
遐蹤睇高潔陽岡棲白
雲偃息孤懷愜幻跡信

萍蹤虛衿皎冰雪

旅懷

落木號淒風蟋蟀鳴四壁寒燈照簾帷叢薄林露滴敝
帙散未收遺言藉閒適更長城鼓遙星月雜行跡餘夢
感遐思初霜古楓赤忽茲歲月深輾軻念登歷虛中竟
誰論永夕增歎息無寐幽抱盈空林靜寒碧

擬古

朝陽生東樹微月流西岑清泉活活流好鳥交交吟春

夏氣候殊涼燠自馭尋美人崇蘭佩芳香襲衣襟邈然
與世隔空睇瑤華音蹇修曷為言感慨投吾簪

吳孺子

秋雨將至新涼滿戶忽有故園桑梓之念因寄
東齋文石禪師

秋雨望即至輕雷遠層城新涼滿庭戶灑然有餘情故
園蘭溪上稻穫秋已成弟姪共我長會能學耦耕如何
江海間惜此一浮名吾師住東齋早晚寄鐘聲下堦春

草長閉戶秋蟬鳴
忻將解後緣遂令薄世營

徐穎

宿何氏山居

日南氣多燠草樹冬未黃
山行不山宿愛君溪山堂
村居百事集異書探石倉
香秔初脫杵嘉魚出寒塘
既觴復就奕明月登我牀
野田犬驚睡每吠燈燭光
乃知靜者意所遇皆故鄉

李廷昱

和陶飲酒詩

寄此一椽下日遭羣動喧我自飲吾酒勿覺日影偏終
身在城市仍不異雲山清風與明月有時相往還昨者
事已往今者又何言

齋中讀書

結廬西漾陂披雲攬丘壑絕塵自奔軌翰墨欣有託寤
言聊獨賞古人良可作非必琴酒娛頗得詩歌樂達生
貴知命引興在寥廓微陽明夕扉窈窕青山郭

梵琦

和淵明九日閑居詩

閑居愛重九使我念陶生但取杯中物不貪身後名
季秋霜始降向晚月初明草際亂蟲語林梢殘葉聲
疎籬采叢菊小嚼扶衰齡美酒既滿樽一吟還一傾
田園自可樂圭衮何足榮貴賤各有志好惡吾無情
所以君子懷悠哉歲功成

和淵明新蟬詩

新蟬何處來鳴我高槐陰流水欲入屋好風自開襟牀
頭一束書壁上三尺琴琴以散哀樂書以通古今所幸
車馬稀非邀里人欽虛名如北斗有酒不能斟縱洗爰
居耳寧知鐘鼓音陶潛初解組蘇軾未投簪莫改麋鹿
性常懷煙嶂深

宗泐

喜清遠兄至用齊已韻四首

錄三首

前年浙僧來稍稍聞去就持斧往越山移幢入吳岫高

居既鄰支朗詠亦依畫應世自無心麻衣澹如舊
良友平生親風塵散何許草莽或零落雲霄亦騫舉天
地日淒涼折芳欲誰與所嗟芙蓉花白露下秋浦
少年同居日聞君拂絲桐高齋月照席兩耳生松風當
時青雲士奇文詠空同往事春花歇江水今自東

冰雪窩

道人冰雪窩巖棲稱岑寂洞門白日陰三徑青苔色片
雲檐外生落葉階前積更深芋火紅晝靜茶煙碧淡泊

中自怡安居無不適彼美西方人時時勞念憶

送銛上人省親

青山澹斜暉驚風在高樹行客起遐思雙親髮垂素雲
飛滄海遙鴈下寒空暮老來惟夢歸隨君故鄉路

題五龍山房圖

剡中東南奇若人緇侶勝一住忽十年禪房得深靜高
扉敞重崖脩橋入危磴林端識名香水際聞清磬微茫
度雲壑掩映披華逕長松支遁吟盤月曇猷定別來幾

夢思遊塵生塵柄晨窗對新圖蕭條發孤詠

春雨吟

溪南有奇山不見二十日今朝雲忽去天高數峯出東
風晚生寒細雨又復密坐觀微霧昇化為白練冪側想
巖居人林臥頭不櫛崖滑徑且暗何由采芝朮

風雪歸莊圖

山路獨歸翁手攜一壺酒千林雪正深扁舟在溪口茅
茨闕石根垂蘿穿戶牖江城看圖人幾迴興歎久

暮過賞溪

日暮衆鳥歸孤雲亦還山市人爭渡息小舟沙際閑我
屋西峯下半出青林間鐘聲動深念無為尚塵寰

夏夜與錢子貞集西齋賦詩叙別

明月不可招流光入堂中白雲不可約挂我屋上松茲
會固難得後學寧易逢明朝在東郊隔水但聞鐘

奉和鎬彥基尊師待相空至

實公同門英論交二十載賦詩多新語亦足邁前代偶

與仙翁言久別思一會溪山入春明花鳥亦相待孤雲
本無期行蹤定何在日暮倚東風疎鐘起天外

出峽圖

瞿塘水如馬五月不可下兩舟何處來披圖一驚詫前
行稍趨平勢若閑暇者後來方履險衆篙不停把巖迴
古木披峽東哀湍瀉嗟爾駕舟人安危在操舍

松下居偶作

我此松下居即事良可悅閉戶留白雲開軒放明月松

響風忽來泉流雨初歇時有西齋人相親嘿無說

送僧遊廬山

廬山天下奇良遊遂平素江帆渺何之連峯散晴霧雲
端五老人粲然風骨露青衣或來迎木客時相遇夜坐
松底石天燈知幾處忽聞巖際鐘忘却東林路

冬夜憶清遠道初二兄

夜深霜氣寒窓月皎如燭鳴鴻尚遐征孤鶴亦驚宿念
我平生親悵焉動心曲四明是何處茗溪如在目異方

詎能通遠道何由縮十年無一字信是如金玉白髮漸
欺人晤言安可卜

贈安古心還山中

子來能幾時遽有還山想長笑輕別離一策晨獨往舊
房青澗阿夜雨新泉響門前嘉樹林陰陰夏條長即此
人事絕遂爾長偃仰得句林花開彈琴山月上蕭散世
念疎澹泊道心朗白駒空谷中誰能復羈鞅何彼名利
人勞生在天壤

雜詩三首

我自來涇川星歲已再周
託茲山水勝謂可成遲留
奈何物外牽撫事心悠悠
久知世道惡奚事仍夷猶
林有奇鶴未嘗識羅浮
翩然覓靈鳳接翅崑崙丘

夜久無與適塊然坐空堂
白鳥一何多營營來我傍
靜言聊假寐遂以襲單裳
嚙膚猶可忍聒耳諒難當
晨星耀東廡明月墮西廂
念爾能幾何滅跡於朝陽

落葉委通衢紛然無人掃
但覩新行迹不見舊時道
古

本倚道傍亂藤絡其杪歲暮雖青青終非本容好世人
懷往途悟此苦不早振衣無後期來從漢陰老

送裕上人歸天台

我家赤城東不識華頂嶠遠道送君歸昨夜夢中到岨
泓有泉瓢竹室留茶竈珍重山中人拂衣願同調

辛亥新歲程處士見過常熟別墅臨別賦詩

獻歲春未迴風雨連十日荒村少朋驩窮巷絕人跡程
君汎扁舟茅齋破幽寂遠來見真情睠言忘永夕顧惟

艱難際出處各有役世紛日相纏誰能念疇昔因君尚
道誼臨別增太息獨棹去茫茫空瞻海虞碧

荅夏景瞻

昔居賞溪曲詠迫靡所侵衲衣挂石壁燕坐長松陰子
來慰幽寂語合相知深孤雲十年別明月千里心而我
亦何事投迹此禪林向來結茅地回首空青岑寧知江
海遠遇子復在今百挫志矯矯猶能發狂吟清辭入古
調一鼓薰風琴吁嗟衆響作過耳無留音

雨花臺送客

梁日雨花臺近在城南陌不見講經人空林澹秋色登
高俯大江目送千里客白鳥下滄波孤帆遠山碧

焦山寺鑑師臨江軒

一峯如鉅石屹立江水中寶刹蔚崇構勢與山爭雄若
人於此住超然塵外蹤開軒當水面下瞰馮夷宮魚龍
近几席波濤蕩襟胃有時天宇淨倒影清若空燕坐觀
衆有起滅殊無窮一念寂不動嗒焉心境融焦先邈千

載遺丹射林紅浩歌倚闌夕明月生海東

送瑄上人

揚舲下大江江寒欲飛雪高帆天際遙獨鴈雲邊沒煙
波渺何之倏忽成楚越遂令白首人年華感消歇

守仁

題風雪歸莊圖

北風號枯林寒雲沒西嶺歸翁雪滿笠欲渡愁日暝孤
舟斷磯下驚浪無時靜遂令世外人感此畫中景

待月軒為式藏主作

月出青松林照我松下戶牀前光未滿徘徊更延佇蓮
漏下初更綠煙散東塢浩歌步中庭衣露濕如雨

題錢選畫

太峰青蓮高千仞苔壁古招提隔層雲孤逕入深塢鐘
鳴谷口風木落溪上雨何處夜猿啼歸帆下秋浦

虛亭秋月為實上人作

幽庭坐虛寂月出青松林流光入禪戶涼思滿衣襟六

根淨無垢萬境亦消沉
蕩茲著有想快我遺世心
浩歌秋水篇聊續寒山吟

萬金

趙千里田家四季圖

錄二首

桃花浪已深楊柳風猶弱
鄰曲欣往來逢迎勸耕作
健犢不自暇老農良有託
共醉社日尊陶然得真樂

蠶事方告成鳴蜩有新聲
插秧雨初遍治草日不停
雜坐高樹陰解衣午風清
作勞時自逸孰謂非常情

良琦

夏日招張師聖文學

初夏稍清暢山茨景彌新
桐花落井幹鳥語喜歸人
苔石當坐卧松枝堪挂巾
高士一來此忘言道愈真

雲深巖寺古復此涼雨積
樹密聽猿啼苔深斷人跡
觀理閒慮遣懷君苦情役
觴酒對幽花徘徊候山屐

苔溪客館寄沈自成處士

秋齋人罕至落葉沒行屨
旅宿將就途懷抱不可語
偶

有山中酒而無池上侶遲子一來過鈎簾對踈雨

春夜宿海雲寺

喧靜同一致大隱即山居
廼知道者流所止恒晏如
煌煌舊吳會鬱鬱高人廬
山閣花霧暝池館綠陰初
復此良夜月禪影流碧踈
素友愜清會境寂鐘磬餘
離坐忘言笑超然悟玄虛
不卧如有媿塵路何馳驅

暮春雍熙寺訪沈自成不遇

暇日遠相問古寺幽且深
青苔餘華落雙樹一鶯吟
爐

存散微篆茗熟獨成斟
明當持山酒慰子客居心

夏夜山中

山空素月出天淨涼雨住
羣蟬鳴已息靈籟稍微度
覓竹咽遠水鄰燈映深樹
念茲棲棲者何由了玄悟

懷渭

畫梅二首

瑤臺夕承月玉砌曉凝霜
花映含章發枝橫禁籞長
春風似相識偏惜壽陽粧

折得江南春悵望洛陽客悠悠歲年暮浩浩風塵隔遠
道勿相思相思減容色

德祥

古懷

思尋海底人為乞珊瑚樹持栽此前庭慰彼歲將暮上
棲孤金禽下宿單玉兔四時相並輝顏色長不故

秋懷

露彩發遙林月華散虛席花牖一何清秋衣不知濕驚

鵲起南枝寒蛩響東壁寂寞曠幽懷迢迢楚天碧

題春暉堂

寸草雖有心豈能報春暉丈夫雖有志不如守庭闈萱
花繞砌開乳鳥繞林飛堂上白頭母手縫遊子衣

妙聲

雨

密雲起崇朝飛雨灑高閣蕭瑟傍松檐逶迤帶煙郭坐
來池水滿吟罷林花落已知禾黍秋不耐衣裳薄

村居圖

東村有隱者素髮颯垂領
几上種樹書門前釣魚艇
杭稌風露深葭莢天水永
雲飛洞庭小花落春戶靜
懷哉古逸民披圖發孤咏

靜寄軒

深居一室靜獨坐羣動息
涉世諒無營照空欣有得
風吹松上雨花落澗底石
當期永日閑共此喧中寂

送沈行恕

挾策事行邁言往五湖濱陰風結山岳落葉滿河津之
子忽已遠我懷將焉陳志士惜白日行客念蕭晨況茲
艱難際奪我心所親中情苟不移在遠猶比鄰毋為離
別苦庶以道自珍

水仙詠

百草秋盡死孤花麗巖阿芳心太皎潔歲事成蹉跎微
月步遙夜輕風生素波懷人豈無意路遠欲如何

至仁

飲綠軒

道人住清溪日飲溪中綠
滌慮發天光心花瑩如玉
復愛溪上雲時來檐下宿

次韻竺元和尚山謳

白雲招我歸清泉濯我足
閑將貝葉書遙對青山讀
童子拾松花鄰翁分野菽
却憶馬駒師一箭中羣鹿
千峯梅雨歇繞舍流泉音
萬物各有適孤雲獨無心
時歌少林曲還共寒山吟
啼鳥忽飛去落花幽徑深

梅花報春信竹外香風吹青山與世隔幽意何人知冰
霜政嚴潔雲石相因依佇立望歸鶴月上寒松枝

如蘭

蘆子渡

我行蘆子渡西風寒日斜海城有遺堞黃蘆吹白花征
鴻下荒渚野鳥依晴沙逐彼天風去一葦登海涯

琴清為胡若思教諭作

微颺灑練衣空庭夜寥泚涼葉生露華澄江上新月沖

襟澹無營孤桐絃白雪天秋萬籟鳴霜清百泉咽冥鴻
度湘雲威鳳出丹穴至音聽者稀幽思自超越悵然一
長吟烏啼漏聲徹

道衍

石經山

并序

石經山在燕之范陽郡峰巒秀拔若天竺山故稱
曰小西天隋大業間有法師靜琬者處是山懼聖
教有難不能流通於是發願募緣敦工鑿石為板

刊造一大藏經儲積於山以備其後法師首刊至
唐貞觀初僅成大涅槃一部而法師乃卒其後子
孫繩繩化億萬人乞錢粟刊造餘部歷遼與金然
後完此一大藏貯於巖洞者七地穴者二洞以石
門閉之穴以浮屠鎮之自隋唐遼金及元碑碣森
列照映巖野然而累經干戈無秋毫之犯洪武二
十一年歲在戊辰春正月廿一日余奉旨往觀念
法師之願力宏大堅固是山之泉石靈異清勝故

賦是詩鐫於華嚴堂之壁雖未足彰法師之幽光
庶以紀茲行之歲月而託其不朽也詩曰

峩峩石經山蓮峯吐金碧秀氣鍾太題勝槩擬西域竺
墳五千卷華言百師譯琬公懼變滅鐵筆蒼蒼石片片
青瑤光字字太古色功非一代就用藉萬人力流傳鄙
簡編堅固陋板刻深由地穴藏高從巖洞積初疑神鬼
工迺著造化迹延洪勝汲冢防虞猶孔壁不畏野火燎
詎愁蘚苔蝕茲山既無盡是法寧有極如何大業間得

此至人出幽明獲爾利乾坤配其德大哉弘法心吾徒
可為則

送友人之松江得曙字

潮來沙磧平月落海門曙汀蒲轉風葉堤柳搖煙絮江
頭春可憐天涯人獨去有歌送君行無酒留君住雪浪
沒沙鷗雲帆出江樹回首讀書堆青山不知處

宿福智精舍懷南鄰張羽來儀

我客悵無依君居欣在邇清談夕散歸獨臥松軒裏露

香檻前桂月色池上水懷爾正沈沈不知暮鐘起

蠡口夜歸

日沒渡口昏水風著人熱漁燈帶螢火微光互明滅舟
人報水程路遠行欲歇故山不分明目盡心力絕遙想
山中人待人仍待月

茶軒為陳惟寅賦

千苞凜冰雪一樹當窻几晴旭曉微烘烘遊蜂掠芳蕊澹
香勻蜜露繁豔照煙水幽人賞詠遲每恨殘紅委

訪震師不遇

波澄一溪雲霜紅半山樹荒煙滿空林疎鐘在何處不
遇採樵人復抱孤琴去

和徐一夔遊龍山雜賦

錄一首

出崦不逢山長江波淼淼落日下遙汀寒雲翳沙鳥延
佇目難窮孤帆來樹杪

初春晚坐南軒喜王山人過訪

春陽勢未舒林深暮還冷開軒悵久坐獨對青松影石

龕沍閑雲苔井響寒縵驚客鳥翻翻照佛燈耿耿華輶
辱遠過雜還破幽靜臨風笑語溫道念心已領諒惟高
世士元非翫光景遙送出林扉新月懸西嶺

晚步

晚步出門去林端見新月牛羊下嶺來疎鐘何處歇行
行且復佇遙對西山雪

題友鶴軒圖

幽人適楚意崇軒起山隈涼風響澗水晴霞明砌苔荆

扉夕不掩多應放鶴來

琴臺

崇臺起雲岑夫差日遊宴七絃石上彈閑花落餘片風
清松荅響煙葦草成薦至今想餘音泠泠散秋院

百花洲

水澹接橫塘花多礙舟路波紅晴漾霞沙白寒棲鷺緣
汀漁網集隔渚菱歌度不見昔遊人風煙自朝暮

上方

蓮宮據山椒
宕堯去天咫
風香花雨新
僧行白雲裏
幽沈樹樂靜
蕭散煙鐘起
人登石路迷
依依緣澗水

澣溪

青山兩岸分
夕渡舟橫口
夏雨欲生蓮
秋風先到柳
聲殘煙寺鐘
香餘茅店酒
相見無別人
唯逢耕釣叟

師林精舍遇盈師夜坐

空林長掩關
閑雲去無迹
偶來值禪侶
清談忘永夕
坐久磬聲沈
松堂一燈寂

答楊孟載

棲棲泊城南春深抱幽獨餘花猶綴紅衆樹已滋綠茲
因塵內居始憶山中屋何時陪騎遊吟看舊題竹

溥洽

山澤居為徐端蒙賦

達士不徇俗脩然列仙癯樂天得其趣且作山澤居牽
蘿北幹下石田繞吾廬渠流引溪淙既耕亦可漁芳辰
視庭戶嘉木春已敷兒童識所務爭把種樹書新醅潑

甕盜鄰叟時一呼酣歌擊瓦缶夕陽在桑榆

善啟

十四日歸舟分韻

江黑饒煙嵐咫尺景難了臨發棹還停復恐天未曉恍
然陰翳開日出雲漢表旋吳地匪遙辭闕境云杳客愁
忽若遺吟緒自縈繞坐久望東南斜陽獨歸鳥

大岡

懷友

谷風淒以厲習習吹我襟微煙襲芳樹細雨沾高林雖
有一尊酒對此誰共斟迢遙故人遠矧隔瑤華音安得
駕黃鵠往論古與今緬懷思方續白日苦西沈

普泰

懷南山舊居

我本山中人却來城市住一違猿鶴盟幽思於誰訴茅
舍鎖煙霞蒼苔滋石路欲歸歸未得花落春光暮

方澤

卻月樓夕眺遲蔣白灘不至

飄風鳴軒櫺落葉辭高柯薄暮登層樓伊余心未和悠
悠遠天雲泛泛晴川波去者曾莫留來者奄忽過千秋
旦暮事百歲寧足多但願狎所親歡至相與歌幽人期
不來奈此涼月何

圓理

林居雜言寄同志

芙蓉謝春華鴛鴦念匹儔崇蘭委深谷杖杜生道周萬

物各有時百川無倒流感之傷我懷端已義所仇顧瞻
遠行客誰肯結綢繆請為林壑交得與爾同游終歲混
樵牧聊以忘世憂

明曠

秋興

大火倏以逝涼颼動幽林飛霞騁奇姿孤桐落秋陰顧
言縱芳躅擘秀歷遙岑高視破宇宙曠焉開我襟靈籟
妙徵羽何必筑與琴感此事愉悅聊復送長吟之子出

世者俯仰增遐心

德清

贈王德操

楚人疑鳳鳥仲尼愛麒麟豈不為世瑞所遇非所親耳
目素不接誰能辨其真之子抱奇思翩翩邈風塵迷方
日以衆微言難具陳撫膺發長歎衷曲誰為信出關豈
慕遠遯世甘沈淪良由知者希所以稱聖人

真可

紺圃即事

小居在曠野寂無塵俗想疎鐘深夜聞六根瀉清響晝
讀天竺書幽窓思忽晃犬吠桃花陰麥浪人來往最愛
晚雨晴空林返照爽

法果

山居雜詠

木葉落還窮天風吹不歇向夕啟柴扉繩牀散涼月紛
紛霜薄衣野火時明滅愛月立溪橋溪聲寒泱泱

斯學

雜詩

披雲臥丘壑凌風稅籠樊芳節忽已邁朱明照前軒嘉
樹滋以綠幽草淒以繁丹雘耀庭戶黃鳥啼林園俯聽
石潭響仰視高岺瞰佳期托縣圃遐想踰崑崙臨川有
長歎冀與智者言

秋夜與羅吉甫同賦

夕露鳴蟋蟀秋風動楊柳嘉候苦不常芳華誰能久真

境總會心萬理弗挂口寫此石上琴醉以山中酒

智舷

題陳仲醇小崑山讀書臺

昨日入山來今日出山去去來本無期眷此來時路白
駒花下泉殘月松上露茲廬可息心丘壑有餘趣

夏日南菴諸子見過

偶然憇南野高蔭欣古木室中晤言稀樹下坐忘獨枉
棹來故人逗嘯看新竹深林長閉門豐草高於屋何物

款素心願言宵秉燭

野處雖已適久不聞高詠炳燭夜何短含毫曉未竟涼
雨原上來洗我竹林淨荷池漲莫知松檐溜可聽小舫
勿遽還出嘯風波勁

題郁氏古村圖

仲夏喜無事披圖探野趣不離方寸間寫出幾村樹鳥
道入高冥人家在煙霧溪口挽釣船草際橫樵路是誰
幽棲士遺韻宛如故掩映屋東西松竹凌霜露

廣潤

贈雪山杲公

垝垣甫及肩陋室僅容膝
夜雪啟重扉春雲生四壁
檐傍瀟湘竹窓臨洞庭
橘與之同歲寒不受冰霜色
習氣日以輕持心日以密
枯木忽聞鴉仰視明河沒
蕭然井臼間婆娑自春汲
清齋踈磬餘焚香以終日

宗乘

發皋亭

曉發凌蒼苔徘徊谷中步松門磬已微空翠驚相顧澗
聲雜幽禽巖花落深樹孤懷當何如復此春向暮

明一

堯山余氏溪上納涼

夏館苦煩熱策杖出東扉於焉臨曲澗趺坐憺忘歸嘉
木散清陰芳華揚素輝先秋蟋蟀吟薄暮鷓鴣飛情忘
境自適心寂理無違願言與同好丘壑長相依

大瓊

初出江口

孤嶼天際浮連樯霧中出秋容肅驚飈潮勢盪落日凭
闌舒遠眸推窓散餘帙未能冥至理且冀綜道術吾生
定有涯誰能困蓬華

別馥菴

偶裂塵網出因為汗漫遊愛茲山水縣與子成淹留朝
看白雲起暮聽江水流有時還策杖臨壑復登丘茅屋
多真意動息無所求心期既歷落顧此忘百憂好風西

南來羽翰生素秋臨岐一揮手意氣凌滄洲君還坐巖壑幸無生怨尤

明澗

落葉

臨高觀遠浦愛此水氣清一葉欲辭樹百葉相隨鳴不能同枯枝遂此幽禽情

屈安人

送夫入覲

君往燕山去棄妾雒水傍雒水向東流妾魂隨飛揚丈
夫輕離別壯志在四方努力事明主肯為兒女傷君有
雙親老垂白坐高堂晨昏妾定省喜懼君自量珍重復
珍重叮嚀須記將既為遠別去飲余手中觴莫辭手中
觴為君整行裝陽關歌欲斷柳條絲更長

陸卿子

擬陶

閑居寡世用性本忘華簪淥水盈芳塘清風來茂林弱

紡戲連漪野鳥鳴好音日夕時雨來白雲彌高岑庭草
滌餘滋原野鵲飛霖開顏散遙念濁酒聊自斟

擬李白古風

重陰翳白日陽和轉淒薄霰雪何紛揉草木盡零落長
風終夜厲棲鳥將焉託游子敝貂裘居人羨藜藿所以
商山翁高舉往巖壑

劉苑華

辭姊妹

同作花根葉復作葉前花花中七姊妹並蒂復連了盈
盈二八月引蔓如蓬麻春風時見面秋月明朱華一旦
離長蔓裊裊天之涯北柯戀南條風飄素雲遮柔莖與
綠葉望望長風沙

徐氏

秋日憶姊

日夕登郡樓望遠意悠悠四顧何蕭條淒涼景物秋
噓噓雲中鳥翩翩呼其儔鬱鬱堂前樹蒼蒼枝相樛因之

懷同氣撫景雙淚流臨風無限思憑軒獨夷猶

方孟式

旅況

離羣千里暮朝看曉露斜搖搖煙樹渺細細蒼雲遮月
冷偏依草晝暖不逢花山白寒燈寂并州去轍遐今宵
閨夢遠鄉緒亂啼鴉

風日清美

瞳矐破曉煙柳色展春妍雨餘天微清荷錢貼水圓桑

稠蠶欲老燕語入新年
鵲鵲擇高枝飛花上寶鈿
橘佐真珠醉香泥小玉憐
鞦韆閑女伴風日笑人顛

聞砧

秋將就夜半寒信怯無衣
清砧新弄響愁緒倍調飢
悲霜啼頰潤怨露夕妝稀
嫋嫋腰如束瘦影月光依
懶撲流螢扇暗壁淒伊威
縫裳漸無月徒寄遠心微
金鎖遙天合開時客淚肥
風吹不到地願逐白雲飛

方維儀

北窓

綠蘿結石壁，垂映清芬堂。
孤心在遙夜，當窓明月光。
悲風何處來，吹我薄衣裳。

沈宜修

題小鸞所居疎香閣

次長女昭齊韻

旭日初升晷，瞳矐映綺房。
梨花猶夢雨，宿蝶半迷香。
輕陰籠霞彩，繁英低飄翔。
待將紅袖色，簾影一時芳。
海棠

還折取拂鏡試新妝
新妝方徐理窓外弄鶯簧

次仲女蕙齊韻

遠碧遶庭色參差映日明
竹間翠煙發竹外雙鳩鳴
徑曲繁枝裊媽紅入望盈
博山微一縷煙浮畫羅生
芳樹清風起飄飄落霰輕

次季女瓊章韻

幾點催花雨踈踈入畫樓
推簾望遠墅爛錦盈汀洲
昨夜碧桃樹凝雲綴不流
朝來庭草色挹取暗香浮
飛瓊

方十五吹笙未解愁次第芳菲節清吟知未休

夏初教女學繡有感

憶昔十三餘倚牀初學繡不解春惱人惟譜花含蕊十
五弄瓊簫柳絮吹黏袖挈伴試鞦韆芳草花陰逗十六
畫娥眉蛾眉春欲瘦春風二十年脉脉空長晝流光幾
度新曉夢還如舊落盡薔薇花正是愁時候

姚淑

寄研齋太史

年年歎離別此別何時休樓頭望不見從今不上樓無
錢買鯉魚君書何處求

曹壽奴

贈伯姊

草有並蒂花木有連理枝果有合歡核豆有同根箕魚
或比目游鳥亦比翼隨同功繭作綿合卺玉為卮我與
子姊妹願得不相離出必同車輪居必聯屋楣見月每
共拜弄珠定雙嬉子妝我掠鬢子盥我奉匜我衣擣子

砧子濯污我私機張我續織鏡聽子無持子褰我衾裯
我舖子粥糜寒輒擁子背暑還扇我肌子女迭相抱帷
帳恒並施生從比肩人沒以百歲期

黃媛貞

丁卯冬十二月留別妹皆令

北風淒以栗不忍吹羅襟高雲語征鳥離思兩難沈今
我遠庭闈與子分芳衾寧忘攜手好所以傷我心一言
一回顧別淚垂不禁但得頻寄書母使相望深

朱無瑕

游子

北鴈競南飛寒風正凜冽客思倦長途妾心傷久別厭
聞殘漏聲愁見不圓月日日數歸期空教淚成血

鄭如英

答潘景升寄懷

投我以明鏡照妾如蓬首報以凝桂脂餘膏染君手遺
我屑金墨報君芙蓉紙含毫若有懷應念人千里

王微

重過雨花臺望江有感

春姿靜東岑雲影結遙粲坐覺高臺空不知翠微半落
花自古今啼鳥變昏旦撫化良易遷即事聊成玩況乃
晴江開淥波正拍岸

秋夜送別

握手應無語離亭日漸過霜寒天不曙月好夢無多莫
言君去急妾思逐流波

楊宛

種桐

靜居無寄懷種桐廣除內桐高盈丈餘風露相吸逮本
以遲鳳棲鳳棲不可再我聞古良士往往思其外預愁
斲為琴知音復誰在

無名氏

原心亭詩

見翰林
館課

鬱鬱松樹枝肅肅冬日陰孤亭弘且敞乃在鳳池潯鳳

池超人寰萬籟無一音暫息塵中轍因鮮俗慮侵端坐
邈宇宙掩帙忘古今頓令羣動祛見此方寸心金門足
大隱豈必謝纓簪

申叔舟

陽德驛

北塞歸遠途千里度陵谷日暮投陽德館宇半茅屋輕
風吹枯枝短垣依斷麓雨歇低行雲山深聽鳴鹿坐久
正蕭然清溪走寒玉遠客自無寐呼童剪殘燭

李希輔

葱秀山次唐先生韻

客行值殘臘長程催短景天寒鬚易冰葉脫木無影揮
鞭發安城露濕衣袖冷迤邐度雲漢邂逅逢峻嶺緬懷
董學士曾此憇夏靜突兀數尺碑其文信蔚炳往事浮
雲空幾年孤此境茲山真自幸四牡又來騁留詩繼前
賢頓覺仙凡迥而我苦駕緩古訓蒙不省何幸接詞源
飛流激奔猛涯涘不能窺況敢得要領無心和陽春有

懷徒耿耿願言借餘光破我心昏暝

蘇世讓

蔥秀山次唐先生韻

我並青山行山行信多景淵潭清見底杉檜翠交影況
當沍陰天風日淒以冷蕭蕭晚雨霽突兀見斯巔巖巒
互迴合洞壑極沖靜有如畫圖開不用丹青炳曩時董
學士探勝得真境眷茲心賞諧更將文字騁至今凜清
風未覺歲月迴賞音會有人二妙復來省陽春一繼和

筆力肆豪猛小子忝後塵盛事心已領攬舊又感今中
懷益耿耿沈吟久佇立前峰欲含暝

許筠

感遇

君好堤邊柳妾好巔頭松柳絮忽飄蕩隨風無定蹤不
如歲寒姿青青傲窮冬好惡苦不定憂心徒忡忡

送盧判官

秋山懸夕照客意已悲涼況復當此時送君歸故鄉相

對茅檐下燈火吐清光佳人抱瑤瑟促柱傾壺觴殷勤
須盡醉明發各茫茫

平壤送南士還天朝二首

公子中州彥緬邈青雲姿詩情敵謝朓賦筆凌左思慷
慨請長纓萬里東海涯壯志未廟壘歸驂忽西馳箕郊
尚秋熟行李多嶮巇知音既云稀況復將遠離長路漫
浩浩念之涕雙垂

弱齡有遐想棲遲在丘壑翫世笑東方隱几師南郭中

年來城市誤為簪組縛誰言珥彤管素志非黃閣公子
稽山秀為說稽山樂萬壑夾崖流千巖當鏡落天台與
鴈宕相峙對冥莫所恨天一方不得凌琅嶠尚冀通關
梁東南騁行脚徘徊雲門寺攜手翔寥廓

奇邁

直禁詠懷

南山松柏幽北山煙霧深遊子暮何之庭樹生秋陰歸
雲度遙峯宿鳥橫前林幽懷杳不極清風吹我襟

金淨

遊鄭氏池亭

主人發天祕籬落成滄浪孤亭如鳬鷺載我浮中央清
颺扇中幘山翠滴壺觴游魚聚檐影飛絮冒海棠聊將
倦遊客一笑酬年光森森萬竿竹颺香驅商羊鏡面亂
浮沫藻荇相扶將須臾動漣漪草木耿斜陽

禱龍潭

猿呼鳥復噪四山忽已暮回汀塞杜若葉葉沾涼露聊


就菰蒲眠秋聲在高樹

許景樊

寄伯氏詩

晴窓銀燭低流螢度高閣悄悄深夜寒蕭蕭秋葉落關
河音信稀沈憂不可釋遙想青蓮宮山空蘿月白

御選明詩卷三十五



總校官庶吉士 臣 侍 朝

校對官檢討 臣 蕭九成

謄錄舉人 臣 傅瓌芳